



Xabier Pérez Igrexas, en calidade de Portavoz do Grupo Municipal do Bloque Nacionalista Galego (BNG) no Concello de Vigo, ao abeiro do establecido no Regulamento Orgánico do Pleno e da restante normativa aplicábel, eleva ao Pleno da Corporación para o seu debate a seguinte

MOCIÓN

SOBRE A ATENCIÓN DAS SITUACIÓNS DE VULNERABILIDADE SOCIAL E DE INFRAVIVENDA NA CIDADE DE VIGO

EXPOSICIÓN DE MOTIVOS

O tráxico incendio decorrido o pasado 11 de outubro nun inmóbel de rúa Afonso X, e que se cobrou a vida de catro persoas (tres delas menores), varias feridas de diversa consideración e o desaloxo de case unha trintena de veciñas e veciños, así como o desaloxo de 42 persoas ordenado por razóns de seguridade de dous edificios da rúa Fisterra, o día 19, evidenciaron unha grave problemática social subxacente e as deficiencias e insuficiencias para a súa adecuada atención por parte das diferentes administracións públicas.

En ambos os dous casos as condicións de seguridade e habitabilidade amosaban con toda crueza o fenómeno das infravivendas existentes na nosa cidade. Unha realidade empurrada polo agravamento do problema de acceso social á vivenda, nunha cidade na que malia existiren -segundo datos oficiais do INE- máis de 20 mil vivendas baleiras é cada vez maior o número de persoas e familias que non se poden permitir alugar ou comprar unha.

A falla dunha decidida política de promoción de vivenda pública de protección, pola inacción tanto da Xunta de Galiza (en tanto que administración competente) como polo Goberno municipal (incumprindo as súas promesas electorais), ten como resultado a falla de alternativas habitacionais en condicións dignas e estábeis na maior cidade de Galiza. Non é

un feito novidoso nin colle a ninguén por sorpresa. É o resultado dun desleixo continuado, que no caso do incendio da rúa Afonso X polo alcance da traxedia e tamén por afectar a menores ten as súas orixes no desmantelamento do poboado do Caramuxo sen que nin Xunta, nin Concello ofrecen alternativas.

Tampouco é descoñecida a existencia de numerosos edificios e vivendas que non reúnen as condicións mínimas de habitabilidade e seguridade pero que ou ben non son obxecto de intervención por parte das administracións, ou ben as actuacións fican reducidas a unha tramitación burocrática con máis aparencia que eficacia.

Aliás, a respecto da situación das familias desaloxadas nas últimas semanas, quer na rúa Afonso X quer na rúa Fisterra, resulta preocupante o grao de improvisación pero, sobre todo, de precariedade e incertezas que paira sobre os dispositivos sociais despregados para atender as situacións que se derivan do desaloxo das vivendas.

Para alén da grave problemática social subxacente que se vén de describir, é claro que existe tamén un problema de carácter urbanístico no referido a existencia de infravivendas e outro de seguridade que deixou en evidencia coas súas brutais e dolorosas consecuencias o incendio de Afonso X.

Se xa é moi grave que no momento de se producir esa emerxencia só estivesen operativos 17 efectivos do servizo de bombeiros (dos que 16 participaron directamente das labores de extinción e desaloxo), cando o mínimo determinado polo Concello para cada xornada é de 20 e un recente informe dos propios servizos municipais eleva a 23 para ter garantías de operatividade, é directamente intolerábel que a resposta por parte do Goberno municipal fose mentir publicamente en rolda de prensa, asegurando a concelleira responsábel da área delegada de Seguridade -en presenza do Alcalde- que non coñecía cantos bombeiros estaban en servizo esa xornada e despois cuestionando con falsidades os datos ofrecidos polos propios bombeiros sobre o operativo a través da súa representación sindical. Un comportamento que inhabilita á señora Rodríguez Calviño para continuar á fronte desta concellaría.

Hai unha pregunta que produce arrepiños simplemente formulala: que tería pasado se se produce un segundo incendio noutro punto da cidade no mesmo

momento? Quen ía decidir que vidas se salvan e cales non? Este interrogante interpela de maneira rotunda e inequívoca ao Goberno municipal para que dunha vez actúe para resolver as deficiencias no servizo de bombeiros que levan sendo denunciadas máis de cinco anos.

Cómpre por tanto abordar, cunha perspectiva integral pero con axilidade, esta realidade despregando todas as medidas que foren necesarias nun triplo eixo: actuar para garantir o dereito social á vivenda e ofrecer alternativas habitacionais dignas na cidade para as persoas en situación de vulnerabilidade e/ou exclusión social; intensificar as accións para evitar o agravamento do fenómeno das infravivendas e avanzar na súa resolución con apoio público; e resolver definitivamente a grave insuficiencia de persoal no servizo de bombeiros.

O camiño das solucións pasa necesariamente pola cooperación entre as diferentes administracións, deixando atrás dunha vez por todas a permanente lea que por razóns partidistas se volveu despregar, de maneira indecente, cun intercambio de reproches e acusacións entre Xunta e Concello arredor dos feitos que motivan esta moción que en nada contribuíu a atender as necesidades das viguesas e vigueses.

Polo que, a través desta moción, o Bloque Nacionalista Galego propón ao Pleno a adopción dos seguintes


ACORDOS:

1. Instar aos gobernos municipal e galego a cooperaren no exercicio das súas competencias para atender as necesidades das familias desaloxadas dos inmóbeis da rúas Afonso X e Fisterra facilitándolle os medios e condicións necesarias para retornar á normalidade.
2. Instar ao Goberno municipal a:
 - a) Poñer en marcha unha Axencia Local de Vivenda Protexida e Social para facilitar o acceso á vivenda na cidade desde a promoción pública e cooperativa, e que inclúa unha bolsa de vivenda destinada a ofrecer alternativas habitacionais dignas e estábeis a persoas e familias en situación de vulnerabilidade social.

- b) Reforzar as actuacións dos diferentes servizos municipais, nomeadamente a Xerencia Municipal de Urbanismo, para identificar e adoptar medidas para resolver as situacións de infravivendas existentes na cidade para garantir a seguridade e habitabilidade, con medidas de apoio social ás persoas afectadas.
- c) Adoptar as medidas necesarias coa maior urxencia para garantir que Vigo dispoña da suficiente dotación do servizo de bombeiros en todas as xornadas.
3. Esixir da Xunta de Galiza que exerza as súas competencias en materia de promoción de vivenda protexida e para a adecuada atención integral das situacións de vulnerabilidade e exclusión social na cidade de Vigo.
4. Instar ao alcalde a cesar a dona Patricia Rodríguez Calviño como concelleira-delegada da área de Seguridade por mentir publicamente en relación ao operativo de bombeiros despregado no tráxico incendio da rúa Afonso X, así como pola súa falla de xestión para resolver as deficiencias do servizo.

Vigo, Galiza, 25 de outubro de 2023.

Asdo.



SR. ALCALDE-PRESIDENTE
CONCELLO DE VIGO

Rúa Celso Emilio Ferreiro 3, baixo
36203 Vigo (Galiza)
Tel. 986 44 73 00 | Fax. 986 43 90 91
vigo.cidade@bng.gal
www.vigo.bng.gal